



Služba za reviziju finansijskog poslovanja

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00 i 102/09), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2008. GODINU I POSTIZBORNOG FINANSIJSKOG IZVJEŠTAJA – LOKALNI IZBORI 2008. SOCIJALDEMOKRATSKE PARTIJE BOSNE I HERCEGOVINE

Broj: 03-07-6-1522/09
Sarajevo, 18. maj 2010. godine

SADRŽAJ:

MIŠLJENJE EVIZORA.....	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije	5
Cilj revizije	5
Obim revizije	5
4. PRETHODNE REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE	11

MIŠLJENJE REVIZORA

Služba za reviziju finansijskog poslovanja u Centralnoj izbornoj komisiji Bosne i Hercegovine (u daljem tekstu: Služba za reviziju) je izvršila reviziju finansijskih izvještaja **Socijaldemokratske partije Bosne i Hercegovine** i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da Socijaldemokratska partija Bosne i Hercegovine u izvještajnom periodu nije postupila u skladu sa odredbama člana 3. stav (1), člana 6., člana 8. stav (1) i člana 11. stav (1) i stav (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaji ukazuju da je Socijaldemokratska partija Bosne i Hercegovine u 2008. godini postupala u skladu sa Zakonom o finansiranju političkih stranaka.

1. UVOD

Služba za reviziju finansijskog poslovanja u Centralnoj izbornoj komisiji BiH je izvršila reviziju finansijskih izvještaja Socijaldemokratske partije Bosne i Hercegovine i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Revizija je preduzeta u skladu sa članom 14. stav (1) Zakona o finansiranju političkih stranaka («Službeni glasnik BiH» broj 22/00 i 102/09), članom 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Socijaldemokratska partija BiH je iskazala ukupne prihode u iznosu od 4.261.773,68 KM, čija struktura je data u sljedećoj tabeli¹:

Red.br.	Vrsta prihoda	Iznos u KM	Učešće u uk.prih. %
1	Članarina	263.576,15	6,18%
2	Prilozi fizičkih lica	60.736,38	1,43%
3	Prilozi pravnih lica	190.228,21	4,46%
4	Prihodi od imovine	652.283,16	15,31%
5	Prihodi od pr.lica	0,00	
6	Prihodi od poklona	2.000,00	0,05%
7	Prihodi iz budžeta	3.081.281,03	72,30%
	Ostali prihodi	11.668,75	0,27%
	Ukupni prihodi:	4.261.773,68	100,00%

U godišnjem finansijskom izvještaju politička stranka je iskazala ukupne rashode u iznosu od 4.969.453,67 KM.

2. PREDSTAVLJANJE POLITIČKE STRANKE

Naziv političke stranke: Socijaldemokratska partija Bosne i Hercegovine. Skraćeni naziv stranke je SDP BiH.

Socijaldemokratska partija BiH osnovana je 16.03.1999. godine u Kantonalnom sudu u Sarajevu, pod brojem R-I-1/99.

Sjedište političke stranke je u Sarajevu, ulica Alipašina 41.

Lica ovlaštena za zastupanje stranke su Zlatko Lagumdžija, predsjednik i Nermin Nikšić, generalni sekretar stranke.

Lice ovlašteno za podnošenje finansijskih izvještaja za 2008. godinu je Ferid Buljubašić.

¹ Podaci koji su iskazani u tabeli preuzeti su iz korigovanog godišnjeg finansijskog izvještaja SDP BiH za 2008. godinu, koji je stranka Centralnoj izbornoj komisiji BiH dostavila 05.02.2010. godine.

Prema podacima iz godišnjeg finansijskog izvještaja za 2008. godinu, organizacionu strukturu Socijaldemokratske partije BiH čine:

- Glavni odbor SDP BiH
- 11 kantonalnih odbora
- 3 regionalnih odbora
- 2 gradska odbora
- 89 opštinskih odbora
- OO SDP BiH Brčko distrikt
- Forum mladih

3. OPIS REVIZIJE

Predmet revizije su godišnji finansijski izvještaj za 2008. godinu i postizborni finansijski izvještaj – Lokalni izbori 2008. godine Socijaldemokratske partije BiH i to sljedećih organizacionih dijelova:

- Glavni odbor SDP BiH,
- Kantonalni odbor SDP BiH Sarajevo,
- Općinski odbor SDP BiH Bihać i
- Općinski odbor SDP BiH Zenica.

Cilj revizije je da revizoru omogući da izrazi mišljenje o tome da li je Socijaldemokratska partija BiH u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10. Izbornog zakona Bosne i Hercegovine.

Obim revizije finansijskih izvještaja Socijaldemokratske partije BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na članarine, priloge fizičkih lica, priloge pravnih lica, prihode od imovine, prihode iz budžeta i troškove kampanje.

4. PRETHODNE REVIZIJE

Izvršena je revizija godišnjeg finansijskog izvještaja Socijaldemokratske partije BiH za 2004. i 2006. godinu i pregled godišnjeg finansijskog izvještaja za 2005. i 2007. godinu. Izdati su izvještaji o reviziji i izvještaji o pregledu sa nalazima revizije, mišljenjem revizora i preporukom da stranka treba postupati po odredbama člana 3. stav (1), člana 5. stav (1), člana 6., člana 8. stav (1) i člana 11. stav (3) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2008. godinu, utvrđeno je da Socijaldemokratska partija BiH nije ispoštovala preporuke date u izvještajima o reviziji, odnosno pregledu i da je u 2008. godini postupala suprotno odredbama člana 3. stav (1), člana 6., člana 8. stav (1) i člana 11. stav (1) i (3) Zakona o finansiranju političkih stranaka.

5. NALAZI I PREPORUKE

5.1. NALAZI

a) **Na osnovu obavljene revizije godišnjeg finansijskog izvještaja i ostale finansijske dokumentacije, utvrđeno je da je Socijaldemokratska partija BiH prekršila odredbe člana 3. stav (1) Zakona o finansiranju političkih stranaka.**²

- Socijaldemokratska partija BiH je davala u zakup prostorije u poslovnom objektu koji se nalazi u Zenici, Ulica Masarikova broj 48, koje nisu u njenom vlasništvu i pri tome ostvarila prihod u iznosu od 38.047,40 KM³.

Zgrada koju trenutno koristi, odnosno iznajmljuje Socijaldemokratska partija BiH, bila je u društvenom vlasništvu, kojim je raspolagao Savez komunista BiH, a potom je po presudi suda u Zenici 1991. godine uknjižena u vlasništvo pravnog sljednika SK BiH, Socijaldemokratsku partiju BiH. Naknadno je presudom Višeg suda u Zenici od 13.09.1994. godine uknjižba poništena, te je objekat vraćen u vlasništvo Općine Zenica. Pored niza održanih ročišta, status vlasništva nekretnine do danas nije promijenjen.

Uvidom u izvod iz posjedovnog lista broj 301/03 koji je 01.12.2009. godine pod brojem 12-30-1843/09 izdala Uprava za imovinsko-pravne, geodetske poslove i katastar nekretnina Općine Zenica, a koji se odnosi na nekretninu – zgradu u Ulici Masarikova broj 48, utvrđeno je da se kao posjednik nekretnine vodi SIZ Stambeno preduzeće Zenica.

b) **Revizijom je utvrđeno da Socijaldemokratska partija BiH nije postupila u skladu sa odredbama člana 6. Zakona o finansiranju političkih stranaka.**⁴

- Stranka u finansijskom izvještaju nije prijavila kao prilog sredstva u iznosu od 559,56 Eura, u protuvrijednosti 1.094,40 KM, koja joj je uplatio Oesterr Franz Zentrum Salzburges.
- Također u godišnjem finansijskom izvještaju, SDP BiH nije prijavila dva priloga po 100,00 KM koje je primio OO SDP BiH Derventa.

c) **Revizijom godišnjeg finansijskog izvještaja utvrđeno je da je Socijaldemokratska partija BiH prekršila odredbe člana 8. stav (1) Zakona o finansiranju političkih stranaka.**⁵

- Stranka je od dvije opštine primila zabranjene priloge u ukupnom iznosu od 1.300,00 KM. Od Općine Vogošća primila je 700,00 KM za finansiranje Maskenbala, koji je organizovao Forum žena SDP BiH, dok je od Općine Bihać stranka primila 600,00 KM u svrhu finansiranja revijalne trke ulicama Bihaća – „Trke pobjede“.

² Prema odredbama člana 3. stav (1) Zakona o finansiranju političkih stranaka politička stranka može da se finansira iz sljedećih izvora finansiranja: članarina; priloga pravnih i fizičkih lica; prihoda od imovine u vlasništvu političke stranke; budžeta BiH za finansiranje parlamentarnih grupa u skladu sa članom 10. Zakona, kao i iz entitetskih budžeta i svih njihovih nižih jedinica u skladu sa entitetskim zakonima; dobiti od prihoda preduzeća u vlasništvu političke stranke.

³ SDP BiH je izdao poslovne prostore u Zenici sljedećim pravnim licima: „Dubrovnik“ d.o.o. Zenica, „Forma“ d.o.o. Zenica, „Intercons“ d.o.o. Zenica, i advokatima: Anti Petrušiću, Alminu Dautbegoviću, Daliboru Tikvini i Bakiru Ljuboviću.

⁴ Ako ukupan iznos priloga jednog pravnog ili fizičkog lica premašuje 100 KM, ta uplata mora da se unese u finansijski izvještaj u skladu sa članom 11. Zakona o finansiranju političkih stranaka.

⁵ Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

- Socijaldemokratska partija BiH, odnosno njenih devetnaest organizacionih dijela, bez naknade su koristili poslovne prostorije opštinskih organa uprave, što nije u skladu sa odredbama člana 8. stav (1) Zakona o finansiranju političkih stranaka.

Općinski odbor SDP BiH Ilijaš bez naknade je koristio prostor površine 33,80 m² u vlasništvu Općine Ilijaš. Obzirom da u skladu sa Odlukom o načinu i visini plaćanja zakupnine poslovnih prostora na području općine Ilijaš ("Službene novine Kantona Sarajevo", broj 2/00) najniži iznos mjesečne zakupnine na području ove opštine iznosi 8,00 KM, stranka je ostvarila prilog u iznosu od 3.244,80 KM.

Općina Ilidža je Odlukom o dodjeli na korištenje bez naknade poslovnih prostora Općine Ilidža broj: 01-02-339/08-08 od 19.02.2008. godine, Općinskom odboru SDP BiH Ilidža dodijelila poslovni prostor površine 60 m². U skladu sa Odlukom o općim, jedinstvenim kriterijima dodjele u zakup poslovnih zgrada i prostorija kojima pravo raspolaganja ima Općina Ilidža ("Službene novine Kantona Sarajevo", broj 24/97), visina zakupnine za I zonu iznosi 12,00 KM po m², što je takođe potvrdio i pomoćnik općinskog načelnika za finansije Općine Ilidža, aktom broj 06-14-16569/09-1 od 25.09.2009. godine, koji je dostavljen Centralnoj izbornoj komisiji BiH. Neplaćanjem zakupnine, Općinski odbor SDP BiH Ilidža je ostvario prilog od 8.640,00 KM.

Općina Novo Sarajevo je na osnovu Odluke o dodjeli u zakup poslovnih prostora na kojima pravo raspolaganja ima Općina Novo Sarajevo ("Službene novine Kantona Sarajevo", broj 29/07), Općinskom odboru SDP BiH Novo Sarajevo dodijelila bez naknade poslovni prostor površine 102,20 m². Pomoćnik načelnika ove općine je u aktu broj: 03-23-493/09 od 26.03.2009. godine koji je dostavljen na zahtjev Centralne izborne komisije BiH, naveo da bi u skladu sa odredbama člana 6. predhodno navedene odluke, za političke stranke cijena zakupnine iznosila 5,00 KM po m², u slučaju da iste nisu oslobođene od plaćanja. Oslobođanjem od plaćanja zakupnine, Socijaldemokratska partija BiH je ostvarila prilog od 6.120,00 KM.

Općina Jablanica je Općinskom odboru SDP BiH Jablanica bez naknade za korištenje dodijelila poslovni prostor površine 20,85 m². Na osnovu odluke o prodaji i davanju u zakup poslovnih prostorija („Službeni glasnik Općine Jablanica”, broj 02/06), najniži iznos zakupnine u I zoni ove općine iznosi 8,00 KM po m². Na bazi navedene odluke, utvrđeno je da je Socijaldemokratska partija BiH usljed neplaćanja zakupnine ostvarila prilog od 2.001,60 KM.

Općinski odbor SDP BiH Konjic je koristio općinski poslovni prostor površine 33,66 m². Prema podacima koje je na zahtjev Centralne izborne komisije BiH dostavio načelnik Općine Konjic, aktom broj 08-07-596/09 od 23.03.2009. godine, mjesečna cijena zakupa za ovu političku stranku iznosi 269,28 KM. Obzirom da je Općinsko vijeće Socijaldemokratsku partiju BiH oslobodilo plaćanja zakupnine u 2008. godini, stranka je ostvarila prilog u iznosu od 3.231,36 KM.

Pored navedenih, poslovne prostore bez naknade su koristili i opštinski odbori SDP BiH: Bosanski Brod, Bosanski Petrovac, Sanski most, Novi grad Sarajevo, Stari grad Sarajevo, Gradačac, Kalesija, Lukavac, Breza, Fojnica, Vogošća, Glamoč, Derventa i Teslić.

d) Socijaldemokratska partija BiH nije ispoštovala odredbe člana 11. stav (1) i stav (3) Zakona o finansiranju političkih stranaka ⁶.

- Stranka u finansijskom izvještaju nije iskazala transakcijske račune, niti podatke o prihodima i rashodima za tri organizaciona dijela i to: OO SDP BiH Doboj Jug, OO SDP BiH Bosanski Petrovac i OO SDP BiH Derventa.

Na osnovu dokumentacije, odnosno izvoda sa transakcijskih računa, koje je stranka dostavila u toku revizije, utvrđeno je da je OO SDP BiH Bosanski Petrovac istvario promet u iznosu od 3.200,00 KM po osnovu internog prenosa sredstava sa računa Glavnog odbora SDP BiH, za finansiranje aktivnosti ovog organizacionog dijela.

OO SDP BiH Doboj Jug ostvario promet u iznosu od 4.121,31 KM, od čega je 3.800,00 KM interni prenos sredstava sa računa Glavnog odbora SDP BiH i 317,25 KM je prihod iz budžeta Općine Doboj Jug.

OO SDP BiH Derventa pored internog prenosa sredstva sa računa Glavnog odbora SDP BiH u iznosu od 2.300,00 KM ostvario je prihod iz budžeta Općine Derventa u iznosu od 500,77 KM, prihod od članarina u iznosu od 482,00 KM i dva priloga po 100,00 KM.

- Socijaldemokratska partija BiH u finansijskom izvještaju za 2008. godinu nije iskazala troškove kampanje u iznosu od 88.009,39 KM.

Stranka je sa pravnom licem „Europlakat” d.o.o. Sarajevo 04.09.2008. godine zaključila Ugovor o zakupu reklamnih površina na iznos od 222.015,81 KM. U skladu sa ugovorom, „Europlakat” d.o.o. Sarajevo je Socijaldemokratskoj partiji BiH ispostavio dva računa: Račun broj: 0893-09/08 od 26.09.2008. godine na iznos od 67.003,21 i i Račun broj: 1224-12/08 od 11.12.2008. godine na iznos od 155.012,60 KM, što ukupno iznosi 222.015,81 KM. Stranka je u 2008. godini na troškovima kampanje iskazala iznos od 134.006,42 KM, a razliku do punog iznosa fakturisanih troškova, iznos od 88.009,39 KM, stranka je uknjižila na troškove u 2009. godini.

- U finansijskom izvještaju za 2008. godinu stranka je iskazala manje obaveze prema pravnom licu „Europlakat” d.o.o. Sarajevo za 88.009,39 KM, što je suprotno odredbama člana 23. Pravilnika o godišnjim finansijskim izvještajima političkih stranaka. Stvarne obaveze prema ovom pravnom licu na dan 31.12.2008. godine iznosile su 155.012,60 KM, dok je stranka u finansijskom izvještaju iskazala obavezu u iznosu 67.003,21 KM.

Napomene

- a) Revizijom je utvrđeno da je Socijaldemokratska partija BiH u finansijskom izvještaju kao prihod od imovine stranke, iskazala prihod koji je ostvarila iznajmljivanjem poslovnih prostora koje ova politička stranka posjeduje, koristi i njima raspolaže, a za koje nisu riješeni vlasničko-pravni odnosi. Za većinu nekretnina u zemljišnoknjižnim izvatcima je upisano da su u državnoj svojini, a Socijaldemokratska partija BiH kao pravni sljednik Saveza komunista

⁶ U skladu sa odredbama člana 11. stav (1) Zakona o finansiranju političkih stranaka, politička stranka je obavezna voditi evidencije o svojim prihodima i rashodima, a u skladu sa odredbama stava (3) istog člana, stranka je obavezna podnositi finansijski izvještaj u formi koju odobri Centralna izborna komisija BiH. Sadržaj, forma, način i drugi detalji izvještavanja uređeni su Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06)

Jugoslavije – C.K Saveza komunista BiH, je upisana kao korisnik nekretnina, dok je na dijelu nekretnina na ovu političku stranku upisano pravo raspolaganja.⁷

- Socijaldemokratska partija BiH, kao pravni sljednik Saveza komunista BiH koristi nekretninu, odnosno poslovnu zgradu u Sarajevu, u ulici Alipašina 41. Pored toga što koristi poslovne prostorije za svoj rad, Socijaldemokratska partija BiH je dio zgrade iznajmila Vladi Federacije Bosne i Hercegovine, pa je od zakupnine ostvarene na ovaj način u 2008. godini ostvarila prihod od 423.635,88 KM. Uvidom u zemljišnoknjižni izvadak broj LV/268 od 22.03.2005. godine, utvrđeno je da je nekretnina – zemljište na kome je izgrađena poslovna zgrada, upisana u B. Vlasničkom listu kao državna svojina, a u C. Teretnom listu uknjiženo je pravo korištenja radi podizanja poslovne zgrade na zemljištu iz A. Popisnog lista, u korist Saveza komunista Jugoslavije C.K. Saveza komunista BiH Sarajevo.

Na osnovu prijedloga Socijaldemokratske partije BiH od 12.05.2004. godine za uknjižbu prava građenja na zemljištu državne svojine, Općinski sud u Sarajevu je dana 23.03.2005. godine donio Rješenje broj DN-5063/04, kojim se dozvoljava uknjižba prava korištenja u novi z.k. uložak, nekretnina upisanih kao državna svojina na kojima je pravo raspolaganja do tada imala Općina Centar Sarajevo, radi podizanja poslovne zgrade na navedenom zemljištu u korist Saveza komunista Jugoslavije C.K. Saveza komunista BiH Sarajevo. Rješenje je dostavljeno Socijaldemokratskoj partiji BiH, kao predlagaču uknjižbe, Općini Centar Sarajevo, katastru i upravi prihoda.

- Socijaldemokratska partija BiH je davala u zakup prostorije u poslovnom objektu koji se nalazi u Tuzli, čiji je ona organ korištenja, pri čemu je ostvarila prihod u iznosu od 30.167,00 KM.⁸

Pregledom zemljišnoknjižnog izvotka Katastarske općine Tuzla broj 7868, utvrđeno je da je nekretnina upisana u A. Popisni list – zgrada i zemljište, u B. Vlasničkom listu upisana kao društvena svojina, s time da je organ korištenja nekretnine Socijaldemokratska partija BiH, Opštinski odbor Tuzla. Također, uvidom u Izvod iz prepisa posjedovnog lista broj 1952 izdatog 11.05.1995. godine, utvrđeno je da korisnik nekretnine SDP BiH, Opštinski odbor Tuzla.

- Stranka je pravnom licu „Una“ Bihać izdala pod zakup poslovni prostor u Bihaću i od zakupnine ostvarila prihod od 1.800,00 KM.

Uvidom u zemljišnoknjižni izvadak broj 7217 izdat 18.11.2005. godine, utvrđeno je da je u B. Vlasničkom listu Katastarske općine Bihać nekretnina – zemljište, upisana kao društvena svojina, a u C. Teretnom listu pravo raspolaganja nekretninom je upisano na SDP BiH, kao pravnog sljednika Saveza komunista BiH.⁹

⁷ Član 2. Zakona o vlasničko-pravnim odnosima („Službene novine FBiH“ broj 06/98) vlasništvo tretira kao pravo da se stvar (pokretna i nepokretna) posjeduje, koristi i da se njome raspoložuje sukladno s njenom prirodom i namjenom.

⁸ Poslovni prostori u Tuzli su izdati pod zakup sljedećim pravnim i fizičkim licima: „Task“ d.o.o. Tuzla, „Primax“ d.o.o. Tuzla, UPI banci (sada Intesa Sanpaolo banka), SUR „Mocart“ Tuzla, Krojačkom salonu „Zlata“ Tuzla, Advokatu Bahriji Dautbegoviću i advokatici Milki Tomić.

⁹ Skupština općine Bihać je 09.07.1990. godine donijela Odluku o prenosu prava raspolaganja nad nekretninama. Javno pravobranilaštvo Općine Bihać je 31.01.1991. godine dalo mišljenje broj M.2/91 prema kome nosioci prava raspolaganja i drugih prava ne nepokretnostima u društvenoj svojini, mogu pravnim poslom, uz naknadu ili bez naknade, pribavljati, otuđivati, zamjenjivati i prenositi pravo raspolaganja i druga prava na nepokretnosti pod uslovima određenim Zakonom o prometu nepokretnosti („Službeni list RBiH”, broj 38/78 i 4/89)

b) Socijaldemokratska partija BiH je primila sredstva od inostranih donatora u iznosu od 65.297,99 KM, što je prikazano u narednoj tabeli:

(u KM)

Red br.	Donator	Iznos priloga
1.	Laburisti Velike Britanije	17.380,15
2.	Štokholms Soc. Švedske	47.917,84
	UKUPNO	65.297,99

Stranka je sredstva ostvarila na način što je aplicirala kod Laburističke partije Velike Britanije radi pribavljanja sredstava za finansiranje projekata čiji je cilj: razvoj i jačanje demokratije u ruralnim područjima, razvoj političke strategije socijaldemokrata i ohrabrivanje mladih ljudi za učešće u političkoj debati.

Kod S-kvinnor Štokholm Socijaldemokratska partija BiH je aplicirala radi pribavljanja sredstava za finansiranje projekata podrške demokratizaciji žena u Bosni i Hercegovini i jačanja kapaciteta socijaldemokratkinja za političko djelovanje u vezi problema koji najviše pogađaju žene u Bosni i Hercegovini.

Troškovi predizborne kampanje

Socijaldemokratska partija BiH je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 948.312,09 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM¹⁰ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Socijaldemokratska partija BiH je u svrhu izborne kampanje mogla da potroši 1.333.959,60 KM.

¹⁰ Član 15.10 stav 2. propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

5.2. PREPORUKE

Preporučuje se Socijaldemokratskoj partiji BiH da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da postupa u skladu sa odredbama člana 3. stav (1) Zakona o finansiranju političkih stranaka;*
- *da u finansijskom izvještaju, u skladu sa članom 6. ovog zakona, prijavljuje sve priloge veće od 100,00 KM;*
- *da se ne finansira iz izvora koji su zabranjeni političkim strankama;*
- *da u skladu sa odredbama člana 11. stav (1) Zakona o finansiranju političkih stranaka u svoje evidencije uvede sve rashode koji nastanu u kalendarskoj godini za koju se podnosi izvještaj;*
- *da finansijske izvještaje sastavlja i dostavlja Centralnoj izbornoj komisiji BiH u skladu sa članom 11. stav (3) Zakona o finansiranju političkih stranaka i Pravilnikom o godišnjim finansijskim izvještajima političkih stranaka i*
- *da riješi pitanje vlasničko-pravnih odnosa nad nekretninama koje posjeduje, koristi i sa njima raspolaže sukladno s njihovom prirodom i namjenom.*

KOMENTAR

Socijaldemokratska partija Bosne i Hercegovine se aktom broj: 05-07-105-2/10 od 17.05.2010. godine očitovala na Preliminarni izvještaj o reviziji godišnjeg finansijskog izvještaja za 2008. godinu i postizbornog finansijskog izvještaja – Lokalni izbori 2008. godine. Služba za reviziju je ocijenila da navodi iz očitovanja koji se odnose na kršenje odredaba člana 6. Zakona o finansiranju političkih stranaka, konstatacije stranke vezane za uknjižbu vlasništva nad poslovnim prostorima, kao i navodi da je stranka načinila knjigovodstvenu grešku kod iskazivanja dijela obaveza u 2008. godini nisu utemeljeni na relevantnim činjenicama, niti su potkrijepljeni novim dokazima, te nisu uticali na nalaze revizije navedene u preliminarnom izvještaju.

Zahvaljujemo se osoblju Socijaldemokratske partije BiH na dobroj i korektnoj saradnji tokom obavljanja revizije finansijskih izvještaja.

Mr. Hasida Gušić, Šef Službe za reviziju, revizor

Željko Bakalar, pomoćnik revizora